

OHR i OSCE naglašavaju odgovornosti Republike Srpske za izvršavanje odluka Doma za ljudska prava BiH u vezi Srebrenice

Viši zamjenik visokog predstavnika Bernard Fassier i v.d. šef Misije OSCE-a Victor Tkachenko su juče uputili pismo Predsjedniku Republike Srpske, Predsjedniku Vlade Republike Srpske i Predsjedniku Narodne skupštine RS-a u kome su naglasili odgovornost Republike Srpske (RS) da ispoštuje Odluke Doma za ljudska prava (HRC) u skladu sa Ustavom BiH.

Ambasadori Fassier i Tkachenko su se u svom pismu fokusirali na 49 zahtjeva poznatih kao slučajevi Srebrenica. Ove žalbe su podnijele porodice muškaraca za koje se pretpostavlja da su ubijeni tokom masakra u Srebrenici u julu 1995. godine.

U pismu upućenom Predsjedniku RS-a Draganu Čaviću, Predsjedniku Vlade RS-a Draganu Mikereviću i Predsjedniku Narodne skupštine RS-a Draganu Kaliniću naglašava se činjenica da se brzo približava rok koji je HRC utvrdio da RS otkrije istinu o sudbini žrtava i o mjestu na kome se nalaze njihova tijela, a da još uvijek nema ni znaka da će vlasti RS-a ispoštovati ovaj rok.

Odlukom HRC-a donesenom 7. marta vlastima RS-a se daje šest mjeseci vremena da postupe u skladu sa ovom Odlukom, što uključuje finansijski aspekt i naredbe za dostavljanje informacija. Ambasadori Fassier i Tkachenko pišu da "očekuju da RS preduzme sve aktivnosti potrebne da se u dogledno vrijeme provedu sve naredbe HRC-a i da RS ispuni svoje ustavne obaveze na zadovoljavajući način."

U jučerašnjem pismu se vlasti RS-a takođe podsjećaju i na svoju obavezu da ispoštuju i druga pitanja koja se tiču ratnih zločina, uključujući hapšenje osoba optuženih da su počinili ratne zločine, a prvenstveno Radovana Karadžića i Ratka Mladića.